

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATUK ABD RAHIM BIN BAKRI
(KUDAT)**

PERTANYAAN : LISAN

TARIKH : 17.03.2016

Y.B. DATUK ABD RAHIM BIN BAKRI [KUDAT] minta **MENTERI KEWANGAN** menyatakan langkah-langkah tambahan yang diambil oleh kerajaan di dalam menghadapi penyusutan pendapatan Negara dari hasil minyak dan gas yang mengalami penurunan harga yang mendadak ketika ini.

JAWAPAN

Untuk makluman Ahli Yang Berhormat,

Kerajaan sentiasa mengambil langkah proaktif bagi memastikan pertumbuhan ekonomi negara berada pada landasan yang kukuh. Setelah harga minyak mentah dunia jatuh melebihi 40 peratus daripada USD107 setong pada Julai 2014 kepada USD62 setong pada Disember 2014, Kerajaan pada 20 Januari 2015 telah mengumumkan beberapa langkah strategik yang dapat meningkatkan daya tahan ekonomi domestik, mengurangkan beban kos sara hidup rakyat dan mengoptimumkan perbelanjaan sektor awam.

Pada 28 Januari 2016, Kerajaan sekali lagi telah mengambil langkah yang proaktif dengan menyemak semula andaian harga minyak mentah dunia daripada USD48 setong kepada USD30 hingga USD35 setong bagi tahun 2016, berikutan kejatuhan harga minyak mentah dunia di bawah paras USD40 setong. Langkah pengubahsuaian bajet 2016 tersebut adalah bagi memastikan pertumbuhan ekonomi yang mampan, pertumbuhan ekonomi domestik kekal kukuh serta mampu menghadapi ketidaktentuan ekonomi global.

Dalam hal ini, Kerajaan sentiasa memantau pasaran ekonomi domestik

dan antarabangsa termasuk pasaran harga minyak mentah global untuk mengenal pasti sebarang risiko yang berkemungkinan menyebabkan kelembapan atau kemerosotan ekonomi, di samping mengambil langkah yang sesuai bagi memastikan ekonomi domestik kekal berdaya tahan. Yang lebih penting adalah Kerajaan mempunyai kapasiti dan dapat bertindak balas dengan secepat mungkin sekiranya berlaku krisis ekonomi.

Untuk makluman Ahli Yang Berhormat,

Sekiranya harga minyak jatuh lagi ke paras USD10-USD15 setong, Kerajaan akan mengambil langkah-langkah drastik bagi memastikan pengurusan ekonomi dan kewangan negara tetap terkawal serta kesejahteraan rakyat tidak terjejas. Untuk makluman ahli-ahli Yang Berhormat, trend terkini harga minyak mentah dunia mula meningkat kembali dalam lingkungan harga seperti yang diunjurkan dalam pengubahsuaian bajet 2016. Sehingga 9 Mac 2016, harga minyak mentah dunia (Brent) adalah menghampiri USD40 setong, jauh lebih tinggi berbanding paras USD10-USD15 setong.